

Erngup nukingata innaallagissiornermut atorineqartarnera pillugu Inatsisartut inatsisaat

Kapitali 1

Atuuffa

§ 1. Inatsisartut inatsisaat erngup nukingani isumalluutini innaallagissiornermut atuissamut, suliaassanullu tamatumunnga attuumassutilinnut misissueqqaarnermut atuinnermullu atorineqassaaq.

Imm. 2. Isumannaallisaaneq, peqqinnissaq, avatangiisit, isumalluutini atuneq inuiaqatigiinnilu nungusaataanngitsumik atuissaaq eqqarsaatigalugit suliaassat, inatsimmut ilaatinneqartut isumannaatsumik, kiisalu pissutsinut nunat tamalaat suleriaaseqarneranni akurisaasunut naleqquttumik naapertuuttumillu suliarineqarnissaat Inatsisartut inatsisaatigut anguniarneqarpoq.

§ 2. Inatsisartut inatsisaat erngup nukingani isumalluutinit, ukiumut 1 megawatt (MW) taannaluunniit sinnerlugu pilersuisinnaasutut nalilerneqartunut atorineqassaaq.

Imm. 2. Erngup nukingani innaallagissiorfik qinnutigineqartoq annerpaamik 1 MW tikillugu innaallagissiorsinnaappat, erngup nukingani isumalluutini misissueqqaarnissamut atuissamulluunniit qinnuteqaat nukimmik pilersuineq pillugu Inatsisartut peqqussutaat suliarineqassanersoq Naalakkersuisut aalajangiinnaapput.

Kapitali 2

Misissueqqaarnerit atuinerlu

§ 3. Erngup nukingani isumalluutit innaallagissiornermut atorineqarnissaannut misissueqqaarnernut atuinnernullu Namminersorlutik Oqartussat kisermaassisinnaatitaapput.

§ 4. Erngup nukingani isumalluutit innaallagissiornermut atorineqarnissaannut misissueqqaarnissamut imaluunniit atuissamut Naalakkersuisut piumasaqaatinik immikkut ittunik aalajangersaasinnaapput. Misissueqqaarnissamut atuissamullu akuersissutit immikkoortillugit tunniunneqarsinnaapput.

Imm. 2. Atortussiassanik aatsitassanit pisunik atuinnermut atatillugu nukissamik tunisassiornissamut erngup nukingani isumalluutini misissueqqaarnissamut atuissamullu akuersissutit, suliani taamaattuni oqartussaasut suliaqarnerinut tamarmiisumut atasutut Naalakkersuisunit nalunaarutigineqassapput. Taamaattorli erngup nukingani isumalluutini atuissamut akuersissut aalajangersimasooq Inatsisartut inatsisaat manna malillugu suliarineqassaaq.

Imm. 3. Misissueqqaarnissamut imaluunniit atuissamut akuersissutit malillugit suliaqarnerit Inatsisartut inatsisaat manna, tassunga atatillugu atugassarititaasussatut aalajangersarneqartut aammalu inatsisit allat sukkulluunniit atuuttut naapertorlugit ingerlanneqassapput.

Imm. 4. Qinnuteqartut ataasiakkaat erngup nukingani isumalluutit pineqartut ilaannaanik atuisussatut

naatsorsuutigineqarpata, qinnuteqartunut arlalinnut ataatsikkut imm. 1 malillugu akuersissutini Naalakkersuisut nalunaaruteqarsinnaapput.

§ 5. Misissueqqaarnissamut akuersissutit erngup nukinganik isumalluutitut aalajangersimasunut, nunataanilu killeqarfiliussat iluanni atuuttussanngorlugit, aammalu atugassarititaasut Naalakkersuisunit aalajangersarneqarsimasut tunngavigalugit nalunaarutigineqartassapput.

Imm. 2. Misissueqqaarnissamut akuersissutit ukiut pingasut tikillugit kisermaassisinnaatitaaffinngorlugit tunniunneqassapput. Annertunerusumik misissueqqaarnissaq siunertaralugu misissueqqaarnissamut akuersissutip sivitsorneqarnissaanik Naalakkersuisut nalunaaruteqarsinnaapput. Sivitsuineri piffissap ukiunik pingasunik ilaqqinneqarnissaa akuerineqarsinnaavoq. Piffissaq misissueqqaarnissamut akuersissuteqarfusoq ukiunit arfinilinnit sivisunerussanngilaq.

Imm. 3. Pisinnaatitaaffimmik pigisaqartoq misissueqqaarnissamut akuersissut tunngavigalugu piiannissamut akuersissummik tunineqarsinnaatitaavoq, piumasaqaatit uku tamarmik naammassineqarsimappata:

- 1) Pisinnaatitaaffimmik pigisaqartup misissueqqaarnissamut akuersissut malillugu misissueqqaarneq naammassisimasussaavaa, aammalu atuinissamut akuersissummik tunineqarnissamut qinnuteqaammi allaaserineqartutut suliaasaq naammassisinnaassallugu,
- 2) Pisinnaatitaaffimmik pigisaqartup misissueqqaarnissamut akuersissummi piumasaqaatit naammassisimasussaavai, taakkunungalugu misissueqqaarnissamut akuersissut tunngavigalugu atuinissamut akuersissutip nalunaarutigineqarnissaanut piumasaqaatit ilaatinneqarput, aamma
- 3) Misissueqqaarnissamut akuersissutip naannginnerani pisinnaatitaaffimmik pigisaqartoq atuinissamut akuersissummik tunineqarnissamut qinnuteqassaaq.

Imm. 4. Akuersissut ingerlatseqatigiiffimmut, pisinnaatitaaffimmik pigisaqartup toqqagaanut tunniunneqarsinnaavoq, tamanna pillugu tak. § 8, imm. 1.

§ 6. Pisinnaatitaaffimmik pigisaqartoq suliffik suliallu akuersissummi pineqartut, taakkulu inernerit, taakkunungalugu misissuinerup inernerit pillugit nalunaarusianik akuttoqatigiinnik Naalakkersuisunut nassiussisassaaq.

Imm. 2. Nalunaarusiat paasissutissallu, imm. 1 naapertorlugu pisinnaatitaaffimmik pigisaqartup Naalakkersuisunut nassiussai akuersissutip naaneraniit ukiut pingasut tikillugit isertuunneqartussaapput, Inatsisartut inatsisaat manna naapertorlugu allanik aalajangersaasoqarsimanngippat imaluunniit akuersissummi piumasaqaateqartoqarsimanngippat.

Imm. 3. Nalunaarusiornermut kiisalu nalunaarusiamut tassunga atatillugu isertuussinissamut aalajangersakkanik imaluunniit akuersissummi piumasaqaatinik sukumiisunik Naalakkersuisut aalajangersaasinnaapput.

§ 7. Atuinissamut akuersissutit erngup nukinganik isumalluutitut aalajangersimasunut, nunataanilu killeqarfiliussat iluanni atuuttussanngorlugit, aammalu atugassarititaasut allat Naalakkersuisunit aalajangersarneqarsimasut tunngavigalugit nalunaarutigineqartassapput.

Imm. 2. Piumasaqaatit, tassungalugu nukissiornerup minnerpaaffissaanut annerpaaffissaanullu aammalu erngup piiarneqartussap minnerpaaffissaanut annerpaaffissaanullu tunngasut ilanngullugit, tunngavigalugit atuinissamut akuersissutit nalunaarutigineqarsinnaapput.

Imm. 3. Atuinissamut akuersissutit kisermaassisinnaatitaaffiusumik, aammalu ukiut 40-it tikillugit piffissaliiffigineqarlutik tunniunneqartassapput, taamaattoorli takuuk § 13, imm. 2.

Imm. 4. Imm. 3 malillugu atuinissamut akuersissutip piffissaq atuuffissaa, qinnuteqartup piffissaq eqqarsaatigalugu pisariaqartitatut uppersarsagai aallaavigalugit aalajangerneqassaaq.

Kapitali 3

Piumasaqaatit atugassarititaasullu

§ 8. Atuinissamut akuersissutip taamaallaat piginneqatigiiffinnut imaluunniit aktianik piginneqatigiiffinnut, kiisalu ingerlatseqatigiiffeqariaatsinut assingusunut tunniunneqarsinnaavoq. Suliffeqarfik suliffeqarfimmi akuersissullu malillugu suliassanut pisariaqartunik ilisimasaqassaaq aningaasaqarnikkullu tunuliaqutaqassalluni. Ingerlatseqatigiiffik Kalaallit Nunaanni angerlarsimaffeqassaaq. Piffissaq akuersissuteqarfusoq tamakkerlugu suliffeqarfiup imm. 1.-3-mi piumasaqaataasut naammassisimassavai, aammalu aningaasaatiminik atugassaqaartitsissalluni, tassungalu ilanngullugu akiliisarnerninik unitsitsisimassanngilaq, akiliisinnaajunnaarsimassanngilaq imaluunniit pissutsinik tassunga sanilliunneqarsinnaasunik atugaqassanngilaq.

Imm. 2. Atuinissamik akuersissummik tunineqartoq aammattaaq erngup nukinganik innaallagissiorfimmik, atortunillu tassunga atasunik tamanik piginnittuussaaq, taakkunungalu ilaapput sapusiat, ikerasaliat, sulluliat, tasinngortalit, ruujorit, turbinit, pilersuinermit aqqusersuutit il.il., akuersissutitut nalunaarutigineqartoq naapertorlugu innaallagissiornermi atorneqartussat. Tassani pineqanngillat erngup nukinganik innaallagissiorfiit atortullu tassunga atasut Namminersorlutik Oqartussanit attartortinneqartut.

§ 9. Misissueqqaarneq atuinissarlugu, taakkulu siunertaralugit iliuusissat aallartinneqartussat aallartinneqannginnerini, suliffeqarfimmut pilersaarut Naalakkersuisunit akuerineqassaaq.

§ 10. Suliffeqarfik, atuinissamut akuersissummik nalunaarfigineqartoq taamaallaat suliffeqarfimmi erngup nukinganut innaallagissiorfilimmik pilersitsisinnaavoq ingerlatsisinnaallunilu, taamaattoqli takuuk imm. 2.

Imm. 2. Naalakkersuisut suliffeqarfiup, atuinissamut akuersissuteqarfigineqartup aamma suliffeqarfimmi attuumassuteqartumik allamik ingerlatsisinnaanissaanut akuersissummik nalunaaruteqarsinnaapput. Suliffeqarfiup attuumassuteqartup pilersinneqarnissaanut ingerlanneqarnissaanullu akuersissut, atuinissamut akuersissutip, tassanilu aalajangersakkat akuersissuteqarnissamullu atugassarititaasussatut aalajangersarneqartut ilaattut aalajangersarneqassaaq.

§ 11. Erngup nukinganik isumalluutit innaallagissiornermut atorneqarnissaannut misissueqqaarnissamut atuinissamullu akuersinissamut piumasaqaatit pillugit Naalakkersuisut aalajangersaasinnaapput. Naalakkersuisut ilaatigut makku pillugit aalajangersakkanik aamma akuersissutinut atugassarititaasussanik aalajangersaasinnaapput:

- 1) innaallagissiaq atorneqartussamit sinneruttoq kiisalu innaallagissiap ilaa pisortat innaallagissamut aqqusersuutaat imaluunniit suleqataasut namminersortut aqutigalugit pilersuinermit atorneqartoq.
- 2) akuersissummi piumasaqaatitut aalajangersarneqartut naammassineqarsimanersut pillugu Naalakkersuisut pisinnaatitaaffimmillu pigisaqartup akornanni aqqiagiinngissutit isumaqatigiissitsiniartarnernut eqqartuussivimmut suliaqkiissutigineqassasut, taassumalu aalajangiinera inaarutaasussaavoq,
- 3) misissueqqaarnermi suliassamik ilusilersuineq piffissamullu pilersaarut,
- 4) pisinnaatitaaffimmi pigisaqartup aqqiissuusaanikkut teknikkikkullu pisinnaasaanut uppersarsaneq,
- 5) nalunaarusiortussaataaneq aamma qularnaveeqqusiissuteqarnissamut piumasaqaatit, aamma

6) avatangiisinik iluarseeqqinnissaq tamatumunngalu qularnaveeqqusiinissaq.

Imm. 2. Erngup nukinganik innaallagissiorfimmik, innaallagissiorfiup innaallagissiaata annersaa aatsitassarsiornermut atatillugu atorneqassappat, sananissamut ingerlatsinermullu akuersissut aatsitassarsiornermut sulianullu tamatumunnga tunngassuteqartunut Inatsisartut Inatsisaat (aatsitassarsiornermut inatsit) naapertorlugu Naalakkersuisunit nalunaarutigineqassaaq. Erngup nukinganik isumalluutitik atuinissamut akuersissut Inatsisartut inatsisaanni atuuttumi § 4, imm. 2 naapertorlugu aatsaat tunniunneqarsimappat, akuersissut taamaattoq nalunaarutigineqarsinnaavoq. Aalajangersakkat imaluunniit akuersissuteqarnissamut piumasaqaatit, imm. 1 imaluunniit Inatsisartut inatsisaanni maleruagassat allat naapertorlugit aalajangersarneqarsimasut aatsitassanik misissueqqaarnermut, misissuinermut atuinermullu, kiisalu tamatumunnga atatillugu erngup nukinganik innaallagissiorfimmik sananermut ingerlatsinermullu atatillugu Naalakkersuisunit saneqqunneqarsinnaapput.

Imm. 3. Pisinnaatitaaffimmik pigisaqartoq allallu, Inatsisartut inatsisaanni ilaatinneqartut, inatsit atuuttoq malillugu oqartussaasut suliaqarnerinut sunulluunniit atatillugu aningaasartuutitik akiliissapput. Akiligassat akitsuutitut imaluunniit aningaasartuutitut utertitsinertut akilersinneqarsinnaapput. Sulianik suliaqarnermut imaluunniit oqartussaasut suliaqarnerinut atatillugu aningaasartuutaasut eqqarsaatigalugit akitsuutit aalajangerneqassapput, taakkununngalu nakkutilliinermut aammalu avataaniit siunnersorteqarnermut ikiorteqarnermullu aningaasartuutit ilaatinneqassapput.

Imm. 4. Pisinnaatitaaffimmik pigisaqartoq akiligassanik qanoq annertussusilinnik Namminersorlutik Oqartussanut akiliisassanersoq atuinissamut akuersissummi aalajangersarneqartassaaq. Tassunga ilanngullugu akiligassaq, erngup nukinganik isumalluutitut annertussusiliussaq, akuersissummi ilaatinneqartoq (annertussutsimut akiliutit) tunngavigalugu, erngup nukinganik isumalluutitik atuiueq aalajangersimasoq (atuinermut akiliutit) tunngavigalugu imaluunniit innaallagissiaq tunisassiarineqartoq (tunisassiornermut akiliutit) tunngavigalugu naatsorsorneqartoq akilersinneqartoq aalajangersarneqarsinnaavoq. Kiisalu suliffeqarfimmi akuersissuteqarfusumi aningaasaqarnikkut iluanaarutissanit (iluanaarutissanit akiliutit) Namminersorlutik Oqartussanut akiliuteqarnissamut piumasaqaatinik aalajangersaasoqarsinnaavoq.

Imm. 5. Pisinnaatitaaffimmik pigisaqartup sulisartunik nunaqavissunik atuinissaa pillugu akuersissummut atugassarititaasunik aalajangersakkanillu Naalakkersuisut aalajangersaassapput. Taamaattoq suliffeqarfiup pisariaqartitsinera tunngavigalugu sulisussanik piginnaaneqartunik Kalaallit Nunaanni pissaqartoqartinnagu, pisinnaatitaaffimmik pigisaqartoq sulisussanik, Kalaallit Nunaata saniatigut sumiiffinnit allaaneersunik atuisinnaavoq. Suliassani, pilersuinerni kiffartuussinernilu nunaqavissut suliffeqarfiutaannik pisinnaatitaaffimmik pigisaqartup atuinissaa pillugu Naalakkersuisut akuersissummut atugassarititaasunik aalajangersakkanilu aalajangersaassapput. Taamaattoq nunaqavissut suliffeqarfiutaat teknikkikkut niuernikkulluunniit unammillersinnaassuseqanngippata suliffeqarfiit allat atorneqarsinnaapput.

Imm. 6. Pisinnaatitaaffimmik pigisaqartup pissutsinik teknikkimut, avatangiisinut isumaginninnermilu aningaasaqarnermut tunngasunik misissuisarnissaa naliliisarnissaalu pillugu akuersissuteqarnermut piumasaqaatinik aalajangersakkanillu Naalakkersuisut aalajangersaassinnaapput, ilanngullugit inuiaqatigiinni piujuartussamik iluaqutaasumik sunniuteqartitsinissaq, tamanna pillugu nassuiaatinik suliaqartarnissaq.

Imm. 7. Qanoq pisoqartillugu misissueqqaarnissamut atuinissamullu akuersissutit

atorunnaarsinneqassanersut, imaluunniit Naalakkersuisunit utertinneqarsinnaanersut pillugu akuersissuteqarnermut piumasaqaatinik aalajangersakkanillu Naalakkersuisut aalajangersaasinnaapput. Akuersissummi aalajangersimasumi tamanna pillugu akuersissuteqarnissamut piumasaqaatit allanneqassapput, aammalu tamanna pillugu aalajangersagaasinnaasunut innersuussisoqassaaq.

§ 12. § 11, imm. 4 malillugu Namminersorlutik Oqartussanut pisinnaatitsissummik pigisaqartup akiliuteqarnissaanut aalajangersaanermut ataqatigiissillugu, pisinnaatitsissummik pigisaqartoq suliaqarnermut akuersissummi pineqartumut ilaasumut akileraaruteqartitsinnginnissamik nalunaarfigineqarsinnaavoq.

Imm. 2. Imm. 1 malillugu akileraaruteqartitsinnginnissamut akuersinissaq sioqqullugu, § 4, imm. 3 malillugu akuersissummut tunniunneqarsimasumut piffissaliussamut, aningaasanut inatsimmi oqaasertaliussamik ilanngussinikkut Naalakkersuisut piginnaatinneqassapput.

Kapitali 4

Atuinissamut akuersissutip isumaqatiginninniutigineqaqqittarnera

§ 13. Atuinissamik akuersissummut piffissaliussap affaata ingerlareernerani akuersissummik pigisaqartoq aamma Naalakkersuisut piffissap atuinissamik akuersissuteqarfiusup naanerata kingorna piffissaq atorineqartussaq pillugu isumaqatiginninniarnernik aallartitsissapput. Taamaattorli akuersissutip atorunnaarnissaanut ukiut qulit sinnerunneranni aatsaat isumaqatiginninniarnernit aallartinneqartariaqarput.

Imm. 2. Atuinissamik akuersissutip ukiut 20-t tikillugit sivitsoqqinnissaanik Naalakkersuisut akuersissuteqarsinnaapput. Piumasaqaatitut aalajangersarneqartut naammassineqarsimappata, piffissaq akuersissuteqarfiusup ukiut 20-t tikillugit ilaqqinneqarsinnaavoq. Piumasaqaatitut aalajangersarneqartut naammassineqarsimappata, pisinnaatitaaffimmik pigisaqartup piffissap akuersissuteqarfiusup ukiut 20-t tikillugit sivitsoqarsinnaaneranut pisinnaatitaaffeqarnera atuinissamut akuersissummi Naalakkersuisut nalunaarutigisinnaavaat.

Imm. 3. Suliassap piviusunngortinnissaanut mianerisassat immikkorluinnaq ittut pisariaqartilerpassuk, Naalakkersuisut imm. 2 naapertorlugu sivitsuinerup saniatigut atugassarititaasussatut aalajangersarneqartut naammassineqarsimappata piffissaq akuersissuteqarfusoq ukiunik 20-nik sivitsoqqissinnaavaat.

Imm. 4. Atuinissamut akuersissutip piffissaq atuuffissaa tamarmiusoq ukiunit 80-init sivilunerussanngilaq.

Imm. 5. Atuinissamut akuersissutip naanerata kingorna piffissaq pillugu isumaqatigiissuteqartoqarsinnaanngippat, § 15, imm. 1 naapertorlugu erngup nukinganik innaallagissiorfik Namminersorlutik Oqartussat tigussagaat Naalakkersuisut aalajangersinnaavaat.

§ 14. Piffissap atuinissamut akuersissuteqarfiusup naanissaa sioqqullugu erngup nukinganik innaallagissiorfiup Namminersorlutik Oqartussanut akeqanngitsumik tunniunneqarnissaa pillugu Naalakkersuisut aamma atuinissamut akuersissummik pigisaqartoq isumaqatigiissuteqarsinnaapput.

Kapitali 5

Tiguisinnaatitaaneq

§ 15. Piffissap atuinissamik akuersissuteqarfiusup naanerani atorunnaarneraniluunniit, erngup nukinganik innaallagissiorfik Namminersorlutik Oqartussanut tunniunneqassasoq Naalakkersuisut atuinissamut piumasaqaatini aalajangersinnaavaat imaluunniit aalajangiisnaapput. Taamaattoqartillugu

akuersissummik pigisaqartup erngup nukinganik innaallagissiorfik atortullu tassunga atasut, taakkunungalu sapusiat, ikerasaliat, sulluliat, tasinngortalit, ruujorit, turbinit, pilersuinermit aqqusersuutit il.il. ilanngullugit, kiisalu inissiat atortullu erngup nukinganik innaallagissiorfiup ingerlanneqarnerani atorneqartut, Namminersorlutik Oqartussanut tamakkiisumik pigineqartussanngorlugit akeqanngitsumillu tunniutissavai.

Imm. 2. § 7 naapertorlugu tiguisinnaatitaaneq, akuersissummik tunniussinermit aalajangersaavigineqartoq Kalaallit Nunaanni Eqqartuussivimmi nalunaarsorneqassaaq.

Imm. 3. Imm. 1 naapertorlugu tigusinissap aalajangiunneqarneranut atatillugu Naalakkersuisut aalajangiisinnaapput, erngup nukinganik innaallagissiorfik tamakkiisumik ingerlasinnaatillugu tunniunneqassasoq, tamatumani imaassimanngippat atugassarititaasut taamaattut atuinissamut akuersissummik pigisaqartumut naleqqutinngitsumik nammakkersuutaalissasut.

Imm. 4. Inatsisartut inatsisaat manna naapertorlugu erngup nukinganik innaallagissiorfiup Namminersorlutik Oqartussanut tunniunneqarnissaa ukiunik pingasunik sioqqullugu, Namminersorlutik Oqartussat tigusinissaannut pisariaqartunik piareersaateqarniarlutik, aammalu ataavartumik ingerlatsinerup ingerlaannarnissaa qulakkeerniarlugu tamakkiisumik akornusersorneqaratillu erngup nukinganik innaallagissiorfimmut atortuinullu tassunga atasunut Naalakkersuisut isersinnaatitaassapput. Atuinissamut akuersissummik pigisaqartumut annertuumik akornutaanngitsumik aningaasartuutaanngitsumillu tamanna pissaaq.

Imm. 5. Erngup nukinganik innaallagissiorfik Namminersorlutik Oqartussanut tunniunneqanngippat, atuinissamik akuersissummik pigisaqartup sulinini unitsissavaa, aammalu erngup nukinganik innaallagissiorfik, maleruagassanut Naalakkersuisut tamatumunnga aalajangersagaannut aammalu akuersissummi piumasaqaatinut aalajangersakkanut naapertuuttumik matusinissaq isumagissallugu.

Imm. 6. Tiguisinnaatitaanermut akuersissummi piumasaqaatinik aalajangersakkanillu ersarinnerusunik Naalakkersuisut aalajangersaasinnaapput, tassungalu pissutsit imm. 1-5-imi taaneqartut ilaapput.

§ 16. § 15, imm. 1 naapertorlugu erngup nukinganik innaallagissiorfik tiguneqarpat, akiligassat nammagassallu erngup nukinganik innaallagissiorfiup pisussaaffigisai tamarmik atorunnaassapput.

§ 17. Erngup nukinganik innaallagissiorfimmut tiguneqartumik attartortitsinissamik Naalakkersuisut isumaqatigiissuteqarsinnaapput. Inatsisartut inatsisaanni matumani aalajangersakkat naapertorlugit attartortoq atuinissamut akuersissummik nalunaarfigineqassaaq.

Kapitali 6

Oqartussaasut suliarinnittarnerat

§ 18. Misissueqqaarnissamut atuinissamulluunniit akuersissummik qinnuteqaat Naalakkersuisunut tunniunneqassaaq.

Imm. 2. Suliaq Inatsisartut inatsisaanni matumani pineqartunut ilaasoq oqartussaasumit ataatsimit ingerlanneqassasoq Naalakkersuisut aalajangersinnaavaat, aammalu ingerlatsinerup ingerlanneqarnissaa pillugu Inatsisartut inatsisaanni matumani killissarititaasut iluanni sukumiinerusunik maleruagassiorsinnaallutik.

Imm. 3. Inatsisit oqartussaasut allat piginnaatitaaffisa ataanni inissisimasut ataqqillugit, sumiiffit akuersissummut ilaatinneqartut iluini avataannilu suliffeqarfinnik suliaassanillu, Inatsisartut inatsisaat manna naapertorlugu ilaatinneqartunik ingerlatsinissamut aalajangersakkanik akuersissuteqarnissamullu piumasaqaatinik Naalakkersuisut aalajangersaasinnaapput.

§ 19. Misissueqqaarnissamut imaluunniit atuinissamut akuersissuteqartoqannginnerani tusarniaasoqarsimassaaq. Tusarniaanermi ilaatinneqassapput:

- 1) Kikkulluunniit suliap inernissaanut ataasiakkaarlutik annertuumillu soqutigisaqartut.
- 2) Sulisitsisut kattuffii aamma sulisartut kattuffii, kiisalu Kalaallit Nunaanni peqatigiiffiit kattuffillu, malittarisassatik malillugit inuiaqatigiinni piujuartitsisussamik iluaqutaasumik sunniuteqartitsinissamut, avatangiisinik illersuinissamut imaluunniit inuit pisinnaatitaaffinut tunngatillugu annertuunik soqutigisaqartut.
- 3) Kommunit oqartussaasullu kalluarneqartussat.

Imm. 2. Naalakkersuisut sivikinnerpaamik sapaatit akunnerini arfinilinni tusarniaanermi akissuteqarnissamut piffissaqartitsinissamik aalajangersaassapput.

§ 20. Akuersissummik qinnuteqartut aamma akuersissummik pigisaqartut paasissutissat, Inatsisartut inatsisaat, maleruagassat taanna tunngavigalugu aalajangersarneqartut aammalu akuersissuteqarnermi piumasaqaatit naapertorlugit oqartussaasutut suliaqarnerminni Naalakkersuisut pisariaqartinneqartutut isumaqarfigisaat tamaasa Naalakkersuisunut nalunaarutigisussaavaat.

Imm. 2. Paasissutissanik nalunaaruteqartarnissamut maleruagassanik Naalakkersuisut aalajangersaasinnaapput, taakkunungalu paasissutissat allagaatinik takunnissinnaatitaanermut maleruagassanut ilaatinneqannginnissaannut maleruagassat ilaatinneqarput.

Kapitali 7

Nakkutilliineq

§ 21. Inatsisartut inatsisaat manna naapertorlugu pisinnaatitaaffimmik pigisaqartup sulineranik Naalakkersuisut nakkutilliisuussapput, aammalu Inatsisartut inatsisaata kiisalu maleruagassat piumasaqaatillu Inatsisartut inatsisaat tunngavigalugu aalajangersarneqartut malinneqarnissaannik peqqusisinnaallutik.

Imm. 2. Naalakkersuisut eqqartuussisup aalajangiineranik tunngaveqanngikkaluarlutik ilisarnaammik atorsinnaasumik takutitsinikkut suliap nakkutigineqarnissaanut pisariaqartitsineq tunngavigalugu suliffeqarfimmi immikkoortunut tamanut isersinnaatitaassapput.

Imm. 3. Akuersissummik pigisaqartup piffissaliussap naleqquttup iluani peqqussut naammassinngippagu, piginnittup akiligaanik annasaqaatigisinnaasaanillu peqqussutaasoq Naalakkersuisunit naammassineqarsinnaavoq.

Kapitali 8

Aalajangersakkat allat

§ 22. Misissueqqaarnissamut imaluunniit atuinissamut akuersissut Kalaallit Nunaanni Eqqartuussivimmi nalunaarsorneqassaaq.

Imm. 2. Misissueqqaarnissamut imaluunniit atuinissamut akuersissummik allamut tunniussineq sunaluunniit, toqqaannartumik toqqaannanngitsumilluunniit pisoq, Naalakkersuisunit akuersissutigineqassaaq. Naalakkersuisut atugassarititaasut Naalakkersuisunit aalajangersarneqartut tunngavigalugit tunniussinissamut siumoortumik akuersissummik pisinnaatitaaffimmik pigisaqartoq nalunaarfigisinnaavaat.

Imm. 3. Imm. 2 naapertorlugu erngup nukinganut akuersissutip tunniunneqarnissaanut akuersinermut atatillugu, aamma nunaminertanut sanaartugassanullu il.il., erngup nukinganut akuersissummut

ilaatinneqartunut, pilersaarusionermut nunaminertanillu atuinermut inatsit naapertorlugu akuersissutit tunniunneqarnissaannut Naalakkersuisut akuersissapput. Naalakkersuisut akuersinissamut piumasaqaatinik aalajangersaasinnaapput.

§ 23. Pisinnaatitaaffimmik pigisaqartoq ajoqusikkanut, suliffeqarfimmi sulianiluunniit akuersissummi pineqartuni pilarineqartunut taarsiinissamut maleruagassat nalinginnaasut malillugit taarsiisussaataitaavoq, inatsisini allani akisussaaffiup ingerlaqqinnissaa allassimangippat.

Imm. 2. Pisinnaatitaaffimmik pigisaqartup taarsiisussaataitaanerata sillimmasiisummik allatulluunniit qularnaveeqqusiisummik matussuserneqarsimanissaa pillugu akuersissummi piumasaqaatini Naalakkersuisut aalajangersaasinnaapput.

Imm. 3. Entreprenyrit, pilersuisut kiffartuussisullu kiffartuussineraat suliffeqarfimmi suliamiluunniit, Inatsisartut inatsisaat manna naapertorlugu akuersissummut ilaatinneqartuni atorneqarnerat naapertorlugu, taarsiisussaataitaanerisa sillimmasiisummik allatulluunniit qularnaveeqqusiisummik matussuserneqarsimanissaat pillugu aalajangersakkanik Naalakkersuisut aalajangersaasinnaapput.

§ 24. Susassaqaanngitsut erngup nukinganik innaallagissiorfimmu sumiiffimmullu akuersissummut atasumut inunnit angalaarfigineqarnissaa immikkut ulorianaateqarsinnaasumut isersinnaanissaat pinngitsoorniarlugu iliuusissat pisariaqartut, atuinnissamik akuersissummi pigisaqartup isumagissava.

Kapitali 9

Pinngitsaaliisummik taarsiinertalimmik pigisanik piginnikkunnaarsitsineq

§ 25. Erngup nukinganik isumalluutini misissueqqaarnerup atuinerullu naammassinissaanut pisariaqartut isigineqarpat, Naalakkersuisut pinngitsaaliisummik taarsiinertalimmik pigisanik piginnikkunnaarsitsisinnaapput. Pinngitsaaliisummik taarsiissutitalimmik pigisanik piginnikkunnaarsitsineq, pinngitsaaliisummik taarsiissutitalimmik pigisanik piginnikkunnaarsitsineq pillugu Inatsisartut inatsisaanni maleruagassat malillugit pissaaq.

Kapitali 10

Pineqaatissiissutaasinnaasut

§ 26. Pinerluttulerinermet inatsimmi pineqaatissiissutaasinnaasut malillugit pineqaatissiisoqarsinnaavoq,

- 1) akuersissummik pigisaqarani suliassanik § 1-imi ilaasunik ingerlatsisunut,
- 2) Inatsisartut inatsisaanni maleruagassanik unioqqutitsisunut,
- 3) Inatsisartut inatsisaat imaluunniit aalajangersakkat Inatsisartut inatsisaat naapertorlugu aalajangersarneqartut naapertorlugit piumasaqaatinik nalunaarutigineqartunik unioqqutitsisunut,
- 4) § 21, naapertorlugu, aalajangersakkat Inatsisartut inatsisaat naapertorlugu aalajangersarneqartut naapertorlugit, imaluunniit akuersissuteqarnermet piumasaqaatit naapertorlugit peqqussutini malinninngitsoortunut, imaluunniit
- 5) paasissutissanik eqqunngitsunik salloqittaallunuunniit tunniussisunut, imaluunniit paasissutissanik § 6, imm. 1, § 20, imm. 1 naapertorlugu imaluunniit inatsisartut inatsisaat tunngavigalugu aalajangersakkat aalajangersarneqarsimasut akuersissuteqarnermulluunniit piumasaqaatit naapertorlugit oqartussaasup piumasarisaanik nipangiussisunut.

Imm. 2. Unioqqutitsisoq suliffeqarfiuppat, tamakkiisumik ilaannaasumilluunniit Namminersorlutik Oqartussanit, kommunimit imaluunniit kommunit suleqatigiiffianit, aktianik piginneqatigiiffimmit, pigisaqaqatigiiffimmit, piginneqatigiiffimmit, assigisaannilluunniit pigineqartoq, suliffeqarfik il.il. taamatut

akisussaatinneqarsinnaavoq. Taamatuttaaq unioqqutitsisut tassaappata Namminersorlutik Oqartussat, kommunit imaluunniit kommunit suleqatigiiffiat, aamma tamanna atuutissaaq.

Imm. 3. Aalajangersakkani Inatsisartut inatsisaat manna naapertorlugu aalajangersarneqartuni maleruagassanik unioqqutitsinerit pinerluttulerinermut inatsimmi maleruagassat naapertorlugit pineqaatissiinermik imaluunniit akiliisussanngortitsinermik kinguneqarsinnaasoq aalajangersarneqarsinnaavoq.

Imm. 4. Maleruagassanik, Inatsisartut inatsisaat naapertorlugu aalajangersarneqartunik unioqqutitsineq suliffeqarfimmit, tamakkiisumik ilaannaasumilluunniit Namminersorlutik Oqartussanit, kommunimit imaluunniit kommunit suleqatigiiffianit, aktianik piginneqatigiiffimmit, pigisaqatigiiffimmit, piginneqatigiiffimmit assigisaannilluunniit pigineqartumit piliarineqarpat, tamanna pinerluttulerinermut inatsit naapertorlugu pineqaatissiisoqarsinnaanera aalajangersarneqarsinnaavoq, tassungalu akiliisussanngortitsisarneq arsaarinnittarnerlu ilaatinneqarput. Taamatuttaaq pinerluttulerinermut inatsit naapertorlugu pineqaatissiisinnaaneq pillugu maleruagassanik aalajangersaasoqarsinnaavoq, tassunga ilaallutik unioqqutitsinerup Namminersorlutik Oqartussanit, kommunimit imaluunniit kommunit suleqatigiiffianit piliarineqarnerani akiliisussanngortitsisarneq arsaarinnittarnerlu.

Imm. 5. Akileeqqusissutit Nunap Karsianut tutsinneqassapput.

§ 27. Unioqqutitsineq aningaasaqarnikkut iluanaarutaasimappat, iluanaarutit Kalaallit Nunaanni Pinerluttulerinermut Inatsit naapertorlugu arsaarinnissutigineqassapput.

Arsaarinnittoqarsinnaanngippat, akiliisitsissutissap annertussusilerneqarnerani tamanna immikkut isiginiarneqassaaq.

Imm. 2. Arsaarinnissutit Nunap Karsianut iluaqutissanngortinneqassapput.

Kapitali 11

Atuutilersitsineq il.il.

§ 28. Inatsisartut inatsisaat 1. august 2014-imi atuutilissaaq. Tamatuma peqatigisaanik Erngup nukingata innaallagissiornermut atorneqartarnera pillugu Inatsisartut inatsisaat nr. 12, 1. december 2009-imeersoq atorunnaarsinneqassaaq.

Imm. 2. Inatsisartut inatsisaata atuutilernerani erngup nukinganik isumalluutinik misissueqqaarnissamut atuilernissamulluunniit akuersissutaareersimasut, Inatsisartut inatsisaannut pineqartumut ilaasut, piffissami akuersissuteqarfusumi atuutiinnassapput. Taakkua manna tikillugu inatsit atuuttoq naapertorlugu maleruagassaqaartinneqaannassapput.

Namminersorlutik Oqartussat, ulloq 8. juni 2014

Aleqa Hammond

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut